

Emma Sofia menempatkan diri di syarikat gergasi dunia

Semasa bergelar mahasiswa Universiti Malaysia Pahang (UMP), Emma Sofia Zulkifli sudah pun melangkah ke alam pekerjaan apabila menyertai Media Lab Studio (MLE) yang disertai oleh tujuh orang mahasiswa UMP yang terdiri daripada rakan-rakannya sendiri.

Ternyata kelebihan dalam meneroka alam pekerjaan pada peringkat awal ini membantu beliau untuk menyesuaikan diri dalam dunia pekerjaan yang lebih mencabar selepas tamat pengajiannya.

Beliau kini menjawat jawatan sebagai Service Analyst di Syarikat DHL IT Services yang sememangnya dikenali sebagai sebuah syarikat gergasi milik negara Jerman yang menawarkan perkhidmatan penghantaran secara meluas di serata dunia menuntut beliau bekerja dengan komitmen yang cukup tinggi mengikut syif kerja yang telah ditetapkan oleh pihak syarikat.

Menurut anak jati Selangor ini, beliau amat bersyukur sekali kerana sebaik sahaja menamatkan pengajiannya di UMP, telah memperoleh pekerjaan dalam bidang yang sama dengan skop pengajiannya dan ditempatkan pula di salah sebuah syarikat gergasi dunia.

“Pengalaman bekerja secara berpasukan yang saya peroleh ketika bersama-sama mengendalikan Media Lab studio dahulu membantu saya untuk menyesuaikan diri dalam suasana kerja di tempat baharu ini memandangkan di sini saya juga dikehendaki bekerja secara berpasukan untuk menjaga dan mengawal sistem yang digunakan di seluruh dunia,” jelas Emma yang meminati sukan kayak dan aktiviti *outdoor*.

Berpegang kepada prinsip bertekad tinggi dan tidak mudah berputus asa, Emma Sofia menyatakan hasratnya untuk menyambung pengajian ke peringkat sarjana dalam bidang yang diceburi supaya beliau dapat melebarkan sayap kerjayanya ke peringkat yang lebih tinggi lagi.

